

Date – 18/06/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Larsap General (Rtd) Vijay Kumar Singh chuan Sawrkar laipui flagship programme 'Ek Bharat Shreshtha Bharat' chu hlut thiam a pawimawh thu a sawi.
2. Chief Minister Pu Lalduhoma chuan faina chu Mizoram hming thatna a nih avangin hlut thiam a pawimawh hle tih a sawi.
3. Evian-a G7 Summit neih karlakah Prime Minister Narendra Modia leh US President Donald Trump te chu nizan khan an inkawm.
4. India leh France te chuan ngaihtuahna thar hman kawngahte, artificial intelligence leh technology lamah thawhdunna tihchak leh zual an remti.

<><><>

GOVERNOR

Mizoram Larsap General (Rtd) Vijay Kumar Singh chuan Sawrkar laipui flagship programme "Ek Bharat Shreshtha Bharat (One India, Great India)" chu hlut thiam a pawimawh thu a sawi.

Nimin khan 'Ek Bharat Shreshtha Bharat' kaltlangin Telangana leh West Bengal State-te dinchamphapak lawmna chu Lok Bhavan-ah neih a ni a, he hunah hian Larsap chuan India rama cheng hnam hrang hrangte inkara inpumkhatna leh inunauna tha zawk a awm theih nana Sawrkar laipui duan 'Ek Bharat Shreshtha Bharat' chu hlut a ngai tih sawiin, India ram hmun tinah tawng, hnam ziarang, nunphung, incheina, ei leh in, sakhua leh adangteah danglamna nasa tak a awm tih a sawi a, Kalkhawmte chu state dangte hnam ziarang leh nunphungte zira hriat chian leh zual tum turin a chah a. A bikin Mizo zirlaite chu hnam dangte tawng thiam tum turin a chah bawk.

Ek Bharat Shreshtha Bharat programme hian India rama State leh UT hrang hranga cheng hnam hrang hrang, hnam ziarang leh nunphung inang lo tak takte inkara inpawhna tha zawk siam leh an inkara inhriatthiam tawna nasa zawk siam a tum a. Ek Bharat Shreshtha Bharat programme kaltlang hian India rama State leh UT hrang

hrangte dinchamphapak lawmna chu Lok Bhavan, Mizoramah Larsap kaihhruaiin June, 2023 atang khan buatsaih tan a ni.



RS ELECTION

Mizoram Rajya Sabha member thlanna chu vawiin hian neih a ni dawn a, chawhma dar 6 atanga tlai dar 4 thleng vote thlak theih a ni ang.

MP candidate hi ZPM atangin Pu K Laltluangkima leh MNF atangin Pi Zothansangi Hmar-te an ni a. Akashvani News Aizawl zawhna chhangin Assembly Secretariat hotute chuan, Assembly Annexe main building committee room-ah open ballot hmangin vote thlak tur a ni.

Rajya Sabha Member thlanna neih turah hian Mizoram Pradesh Congress Committee leh Mizoram State BJP MLA ten vote an thlak ve dawn lo tih nimin khan an puang tawh a.

Rajya Sabha inthlanah hian MLA-te'n vote an thlak dawn a; political party-te'n MLA an neih zat chu - rorel lai ZPM-in 27, MNF-in 10, BJP-in 2 leh Congress party-in 1 a ni a. Tling tur chuan vote 21 hmuh tlin a ngai dawn a; vote tlate hi vawiin tlai dar 5-ah chhiar nghal tur a ni.



AIZAWL DIST TOURIST SITE

Urban Development & Poverty Alleviation Department chuan Aizawl District chhung Tourist Site atan hmun 7 thlangin, heng hmunah te hian hian hman khat daih plastic, Single-Use Plastic (SUP) hman, hralh, sem leh khawl a khap.

Kan corr report ngaithla ang.

UD&PA Dept chuan Aizawl Dist chhunga hmun 7 tourist site ah a thlang a, heng tourist site te hi-

- 1. Lalsavunga Park*
- 2. Falkawn Zokhua*
- 3. Sakawrhmutuui Tlang*
- 4. Hmuifang Tlang*
- 5. Khawhpawp, Lawipu*
- 6. Sairang Railway Station*
- Leh 7. Sialsuk Tlang te a ni a,*

Heng hmunah te hian Solid Waste Management Rules, 2026 hlawhtling taka kalpui a nih theih nan, bawhlawh a paihna tur nilo a paih tih rem nan leh tullo a plastic hmanna tihlem a nih theih nan te he thupek hi chhuah a ni.

Heng hmun tlawhtute, a huamchhunga thil zuar te, dawr neitute leh he thupek in a nghawng tel tur dangte chuan SUP aiah environment tichhe theilo leh hman nawn theih hmang zawk tawh tur an ni a. Nodal Officer leh Sanitation Officer ten SUP

Enforcement Team kaltlangin he Order hi zawm a nih ngei theih nan an bawhzui ang an ti a ni.



CM

Chief Minister Pu Lalduhoma chuan faina chu Mizoram hming thatna a nih avangin hlut thiam a pawimawh hle tih a sawi.

Formosa Foundation chuan nimin khan Thenzawl khaw faina leh bawlhhlawh vawn faina kawnga hmasawna atan Joint YMA Thenzawl hnenah Bawlhhlawh Paihna (Garbage Tipper) motor an hlan a. He hunah hian Chief Minister Pu Lalduhoma chuan, Mizoram tlawhtute'n min fakna ber pakhat chu kan faina leh kan ram kan enkawl dan a ni tih a sawi a. Faina hian Mizoram leh a mipuite hming a tih that thin avangin hlut thiam a pawimawh hle a ni, a ti.

Chief Minister chuan Thenzawl chu Mizoram hmun hma tlawh hlawh ber pakhat, ram chhung hmun hrang hrang atanga tlawhtu tam tak hip khawmtu a nih thu tarlangin, "Hmun nuam leh mawi a nih ang ngei hian faina kawngah pawh hma kan hruai a ngai a ni," a ti a. Formosa Foundation-in bawlhhlawh paihna motor an pe chu Thenzawl khaw hmelmawi leh thianghlim nana thawhpaina hlu tak a nih thu sawiin, lawmthu a sawi bawk a ni.

He hunah hian MLA Pi Baryl Vanneihsang pawhin, faina chuan hriselna chauh ni lovin, hmun hma a timawi thin tih a sawi a. Thenzawl-in khualzin a hip em em avangin, khaw dangte tana entawn tlak leh model ni thei khawpa faina uar turin mipuite a chah a ni.



HORTICULTURE FAIR

Horticulture minister Pu C Lalsawivunga chuan Mizoram chu thla thar leh thil siam lama intodelh turin tan lak a ngai tih a sawi.

Minister hian nimin khan Horticulture Fair 2026 Aizawl Lammualah a hawng a; Mizoramin UT leh State a nih hnu kum 40 atanga 50 vel chhungin intodelhna mumal ala neih loh thu sawiin, tan lak thar a tul a ti.

Pu C Lalsawivunga chuan thlai leh thei thar chhuah leh thil siam chhuah lamah intodelhna sawi tur ala awm lo. Hmasawn zawnga ke pen a tul tawh hle a, theihtawp chhuah a tan tlan a ngai a ni, a ti.

Horticulture Fair hi thei, thlai leh pangpar thara zuartuten hlawkna an neih theih nan kum 2012 atang khan a remchan danin neih thin a nih thu Pu C Lalsawivunga chuan a sawi a; kut hnathawktuten fair hi an hlawkpui thin a, hmunhna zau tha a awm loh thin avangin thil tih a harsa thin. Kuminah erawh Lammualah sorkarin ruahmanna fel tak siama fair buatsaih a ni ta hi a lawmawm takzet a ni, a ti a; nakum lamah chuan tun aia changtlung zawka buatsaih leh tum a nih thu a sawi.

Kumin Horticulture Fair-ah hian district tina kut hnathawktu thawk tha thlanchhuahte hnenah Minister hian lawmman a hlan a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 7 leh a chanve-ah Chanchinthar puan leh a ni ang.



SIR

Chief Electoral Officer Pi Garima Gupta hovin SIR (2026) kalpui meka Electoral Roll Observer ten Electoral Roll Observer te tih tur leh hriat tur te zir hona hun hman a ni.

Secretariat Conference Hall, MINECO-a hun hmanah CEO chuan, ECI duhdan ang ngeia Electoral Roll dik leh felfai kan neih theihnana ruat an nih thu ERO te hriahin, electoral roll thar hlak buatsaih a nih avangin ERO te chu fimkhur taka hna thawk turin a chah a. Final roll chhuah hma ngeia an district chan theuh te chu vawi thum tal an tlawh chhuah a tul thu a sawi a. Mipui ten harsatna an neih ang te ngaihthlak sak turin a chah baw a ni. ERO te hian harsatna an nei a nih chuan CEO office in an puiah theih reng thu a sawi baw.

Khawzawl Election Officer, State Level Master Trainer ni baw Timothy R. Vanlalhmangaiha, chuan Electoral Roll Observer te tih tur tul Powerpoint Presentation hmangin a zirtir a. Mizoram SIR-a kan thlen chin te tarlangin, SIR kalpui mek state-a a hmahruaitu kan nih thu a sawi a. Electoral Roll Observer ten an hriat duh te zawtin, sawihona hun an hmang zui nghal baw a ni.



LUNGLEI DC

Lunglei bawrsap Pi Navneet Mann chuan nimin khan "Ni Khat Atan Bawrsap" thawh hnihna chu hlawhtling takin a buatsaih.

He thil hi Nasha Mukta Bharat Abhiyaan (NMBA) hnuai ruihhlo do beihpui peng khat atan leh, Special Intensive Revision (SIR) 2026 hnuai electoral roll ennawn runpui kalpui mek hlawhtlinna atan tih a ni a, Bawrsap hna thawh dan a taka an hriatna tur leh mawhpurhna pawimawh la ngam tura fuh phurtu atan Lunglei khawpui chhunga zirlai naupang sawmpathum chu Bawrsap thutthleng luahtir an ni.

Bawrsap Pi Navneet Mann chuan Zirlaite chu an sikul leh khawtlangah a tha zawnga danglamna thlentun ni tur te, an tawn hriatte tangkai taka hmang tur leh, ruihhlo do leh democracy pawimawhna puangdarhtu palai nih tum theuh turin a chah a ni.

Zirlai naupang te hi chanchinbu mite nen inkawmin, hemi hunah hian Bawrsap thutthlenga thuin, Lunglei District hmasawna tur hrang hrang thu thar theh darhtute'n an zawh chu an chhang a ni. Tlai lamah "Ni Khat Atan Bawrsap" hun hman atanga Zirlai-Bawrsapte'n an thil zir chhuah leh tawn hriatte inhrilh tawna

hun buatsaih niin, Bawrhsap Pi Navneet Mann chuan Zirlai-Bawrhsapte hnenah hian thuziak a hlan a ni.



PM IN FRANCE

Evian-a G7 Summit neih karlakah Prime Minister Narendra Modia leh US President Donald Trump te chu nizan khan an inkawm. He inbiaknaah hian lawngliana thawktute himna chungchang leh Strait of Hormuz hawn leh chungchangte chu an sawi langsar a ni a. Prime Minister Modia chuan West Asia-a remna siam tura President Trump-a hmalakna chu fakawm atih thu a sawi a. Prime Minister Modia chuan him taka sumdawng lawngte an veivah theih chu India chuan a ngaihpaawimawh ber anih thu sawiin hemi atan hian thawhho tlan a tul thu a sawi a ni.

Prime Minister Modia hian nizan vek khan Paris Khawpui a thleng a. Paris-a India mi chengten ropui takin an lo hmuak a ni. Pu Modia hian vawiinah company hrang hrang hotute a kawm ang a. Hemi hnu hian VivaTech Summit a tel leh dawk bawk a ni.



INDIA FRANCE

India leh France te chuan ngaihtuahna thar hman kawngahte, artificial intelligence leh technology lamah thawhdunna tihchak lehzual an remti. Paris-a VivaTech 2026-a India Pavillion hawnaah he thu hi tarlan a ni a. Union Commerce and Industry Minister Piyush Goyal leh French Minister for Artificial Intelligence and Digital Affairs Anne Le Henanff te chuan ram pahnih thawhdunnain hma a sawn dan hrang hrang te an tarlang a. Pu Goyal-a chuan Prime Minister Narendr Modia leh French President Emmanuel Macron ten India-France Year of Innovation 2026 an puan hnuah nasa takin ram pahnihte thawhdunna a thang a ti a. AI khawvel inher mekah India chu hmun remchang leh tha tak anih dawn thu a sawi bawk a ni.



WORLD CUP

Football inelna lian FIFA World Cup 2026 khelh mekah nizan khan Portugal leh DR Congo te chu goal khat ve ve khungin an inhnehtawk a, player langsar Cristiano Ronaldo te ram chuan an match hmasa berah point khat an hmu a ni.

Tukin zing inkhelah England chuan Croatia chu 4-2 a hnehin point thum an hmu nghal thung a, Ghana chuan Panama lakah si khat faiin hnehna an chang bawk.

Tukin dar 7:30 atang hian Uzbekistan leh Colombia te an inkhel tan ve leh a, chawhma dar 9:30 hian Czechia leh South Africa te an inkhel leh bawk ang, anni pahnih tan hian Group stage-a an match pahnihna a ni tan tawh dawn a ni.

